

摘藻堂四庫全書薈要

集部

欽定四庫全書薈要

集部

樂府詩集卷七

八

詳校官候選知縣臣吳甸華



欽定四庫全書蒼要卷一萬九千七百二十集部

樂府詩集卷七

宋 郭茂倩 編

郊廟歌辭

唐祭汾陰樂章

唐書樂志曰玄宗開元十一年祭皇地祇於汾陰迎神用順和八變皇帝行用太和登歌奠玉帛用肅和迎俎用雍和酌獻飲福

用壽和送文舞出迎武舞入用舒和武舞  
用凱安送神用順和

順和

韓思復

大樂和暢殷薦明神一降通感八變必臻有求斯應無  
德不親降靈醉止休徵萬人

同前

盧從愿

坤元載物陽樂發生播殖資始品彙咸亨列俎綦布方  
壇砥平神歆禋祀后德惟明

同前

劉晃

大君出震有事郊禋齋戒既肅馨香畢陳樂和禮備候  
暖風春恭惟降福實賴明神

同前

韓休

於穆濬哲維清緝熙肅事昭配永言孝思滌濯靜嘉馨  
香在茲神之聽之用受福釐

太和

王峻

於穆聖皇六葉重光太原刻頌后土疏場寶鼎呈符啟

雲孕祥禮樂備矣降福穰穰

肅和

崔玄童

聿脩嚴配展事禋宗祥符寶鼎禮備黃琮祝詞以信明  
德惟聰介茲景福永永無窮

雍和

賈曾

蠲我饑饉絜我膋蕕有豆孔碩為羞既臧至誠無昧精  
意惟芳神其醉止欣欣樂康

壽和

蘇頲

禮物斯具樂章乃陳誰其作主皇考聖真對越在天聖  
明佐神宥然汾上厚澤如春

舒和

何鸞

樂奏云闋禮章載虔禋宗于地昭假于天惟馨薦矣既  
醉歆焉神之降福永永萬年

凱安

蔣挺

維歲之吉維辰之良聖君紱冕肅事壇場大禮已備大  
樂斯張神其醉止降福無彊

順和

源光裕

方立既膳嘉饗載謚齋敬畢誠陶匏貴質秀簋豐薦芳

一作芬

俎盈實永永福流其昇如日

唐禪社首樂章

唐書樂志曰玄宗開元十三年禪社首山

祭地祇樂迎神用順和皇帝行用太和登

歌奠玉帛用肅和迎俎入用雍和初獻用

壽和飲福用福和還宮用太和送神用靈



具醉以代順和

順和

賀知章

至哉含柔德萬物資以生常順稱厚載流謙通變盈聖  
心事能察增廣陳厥誠黃祇僂如在泰折俟咸亨

太和

肅我成命於昭黃祇裘冕而祀陟降在斯五音克備八  
變聿施緝熙肆靖厥心匪離

肅和

黃祇是祇我其夙夜寅畏誠絜匪遑寧舍禮以琮玉薦  
厥茅藉念茲降康胡寧克暇

雍和

夙夜宥密不敢寧宴五齊既陳八音在縣粢盛以絜房  
俎斯薦惟德惟馨尚茲克徧

壽和

惟以明發有懷載殷樂盈而反禮順其裡立清以獻薦  
欲是親於穆不已哀對斯臻

福和

穆穆天子告成岱宗大裘如濡執珽有顛樂以平志禮  
以和容上帝臨我云胡肅邕

太和

昭昭有唐天俾萬國列祖應命四宗順則申錫無疆宗  
我同德曾孫繼緒享神配極

靈具醉

源乾曜

靈具醉香熙熙靈將往眇禋禋顧明德吐正辭爛遺光

流禎祺

唐祭神州樂章

唐書樂志曰貞觀中祭神州于北郊迎神  
用順和皇帝行用太和登歌奠玉帛用肅  
和迎俎用雍和酌獻飲福用壽和送文舞  
出迎武舞入用舒和武舞用凱安送神用  
順和順和詞同夏至方丘太和壽和凱安  
詞同一作冬至圜丘並褚亮等作

肅和

大哉坤儀至哉神縣包含日域牢籠月窟露絮三清風  
調六變皇祇屆止式歆恭薦

雍和

泰折嚴享陰郊展敬禮以導神樂以和性黜牲在列黃  
琮俯暎九土既平萬邦貽慶

舒和

坤道降祥和庶品靈心載德厚羣生水土既調三極泰

文武畢備九區平

唐祭神州樂章

唐書樂志曰太樂舊有祭神州迎送神辭  
二章不詳所起

迎神

黃輿厚載赤裳歸德含育九區保安萬國誠敬無怠  
禮祀有則樂以迎神其儀不忒

送神

神州陰祀洪恩廣濟草樹霑和飛沉沐惠禮脩鼎俎奠  
歆瑤幣送樂有章靈軒其逝

唐祭太社樂章

唐書樂志曰貞觀中祭太社樂迎神用順  
和皇帝行用太和登歌奠玉帛用肅和迎  
俎用雍和酌獻飲福用壽和送文舞出迎  
武舞入用舒和武舞用凱安送神用順和  
順和詞同夏至方丘太和壽和凱安詞同

冬至園丘並褚亮等作

肅和

后土凝德神功協契九域底平兩儀交際戊期應序陰  
墉展幣靈車少留俯歆樽桂

雍和

美報崇本嚴恭展事受露疏壇承風啟地絜粢登俎醇  
犧入饋介福遠流羣生畢遂

舒和



神道發生敷九稼陰極乘仁暢八埏緯武經文隆景化  
登祥薦祉啟豐年

唐祭太社樂章

唐書樂志曰太樂舊有太社迎送神辭二  
章不詳所起

迎神

烈山有子后土有臣播種百穀濟育兆人春官緝禮宗  
伯司禋戊為吉日迎享茲辰

送神

吉祥式就酬功載畢親地尊天禮文經術貺徵令序福  
流初日神馭爰歸祠官其出

唐享先農樂章

唐書樂志曰貞觀中享先農樂迎神用咸和  
皇帝行用太和登歌奠玉帛用肅和迎俎用  
雍和酌獻飲福用壽和送文舞出迎武舞入  
用舒和武舞用凱安送神用咸和其太和壽

和凱安詞同冬至園丘並褚亮等作

咸和

粒食伊始農之所先古今攸賴是日人天耕斯帝籍播  
厥公田式崇明祀神其福焉

肅和

樽彝既列瑚簋方薦歌工載登幣禮斯奠肅肅享祀顒  
顒纓弁神之聽之福流寰縣

雍和

前夕視牲質明奉俎沐芳整弁其儀式序盛禮畢陳嘉樂備舉歆我懿德非馨稷黍

舒和

羽籥低昂文綴已干戚蹈厲武行初望歲祈農神所聽  
延祥介福豈云虛

唐享先農樂章

唐書樂志曰太樂舊有享先農送神辭一章不詳所起

咸和

三推禮就萬庾祈凝寅賓志遠薦藜惟興降歌肅薦垂  
祐祇膺送神有樂神其上昇

唐享先蠶樂章

唐書樂志曰明慶中皇后親蠶內出享先  
蠶樂章迎神用永和亦曰頌德皇后升壇  
用肅和登歌奠幣用展敬迎俎用絜誠飲  
福送神用昭慶

永和

芳春開令序韶苑暢和風惟靈申廣祐利物表神功綺  
會周天宇黼黻深寰中庶幾承慶節歆奠下帷宮

肅和

明靈光至德深功掩百神祥源應節啟福緒逐年新萬  
寓承恩覆七廟佇恭禋于茲申至懇方期遠慶臻

展敬

霞莊列寶衛雲集動和聲金卮薦綺席玉幣委芳庭因

心罄丹款先已勵蒼生所冀延明福於茲享至誠

絜誠

桂筵開玉俎蘭圃薦瓊芳八音調鳳律三獻奉鸞觴絜  
粢申大享庭寓冀降祥神其覃有慶錫福永無疆

昭慶

仙壇禮既畢神駕儼將昇佇屬深祥啟方期庶績凝虔  
誠資宇內務本勗黎蒸靈心昭備享率土洽休徵

唐釋奠文宣王樂章

唐書樂志曰皇太子親釋奠迎神用誠和亦曰宣和皇太子行用承和登歌奠幣用肅和迎俎用雍和送文舞出迎武舞入用舒和武舞用凱安詞同冬至園丘送神用誠和詞同迎神通典曰開元中又造三和樂一曰祓和三公升降及行則奏之二曰豐和享先農則奏之三曰宣和祭孔宣父齊太公則奏之



誠和

聖道日用神幾

一作機

不測金石以陳絃歌載陟爰釋其

菜匪馨於稷來顧來享是宗是極

承和

萬國以貞光上嗣三善茂德表重輪視膳寢門遵要道  
高闢崇賢引正人

肅和

粵惟上聖有縱自天傍周萬物俯應千年舊章允著嘉

贊孔虔王化茲首儒風是宣

雍和

堂獻瑤篚庭敷瓊縣禮備其容樂和其變肅肅親享雍  
雍執奠明德惟馨蘋蘩可薦

舒和

隼集龜開昭聖列龍蹲鳳跼肅神儀尊儒敬業宏圖闡  
緯武經文盛德施

唐享孔子廟樂章

唐書樂志曰太樂舊有享孔子廟迎送神  
辭二章不詳所起

迎神

通吳表聖問老探真三千弟子五百賢人億齡規法萬  
載祠裡絜誠以祭奏樂迎神

送神

醴溢犧象羞陳俎豆魯壁類聞泗川如覲里校覃福胄  
筵承祐雅樂清音送神具奏

唐釋奠武成王樂章

于邵

唐釋奠武成王舊以文宣王樂章用之德宗正元中詔于邵補造

迎神

卜畋不從兆發非熊乃傾荒政爰佐一戎盛烈載垂命祀維崇日練上戊宿嚴闕宮迎奏嘉至感而遂通

奠幣登歌

管磬升壇薌集上公進嘉幣執信以通儉如及恢帝功

錫后邑四維張百度立綿億載邈難挹

迎俎酌獻

五齊絜九牢碩椀糜循巽竿滌進具物揚鴻勳和奏發  
高靈寂虔告終繁祉錫昭秩祀永無易

亞獻終獻

貳觴以獻三變其終顧此非馨尚達斯衷茅縮可致神  
歆載融始神翊周拯溺除凶時維降祐永絕興戎

送神

明祀方終備樂斯闋黜纁就瘞豆籩告撤胙蠻尚餘光  
景云滅返歸虛極神心則悅

唐享龍池樂章

唐書樂志曰玄宗龍潛時宅隆慶坊宅南坊人所居忽變為池望氣者異焉故中宗季年汎舟池中玄宗正位以坊為宮池水逾大彌漫數里因為龍池樂以歌其祥新書禮樂志曰龍池樂舞者十二人冠芙蓉

冠攝履備用雅樂唯無鐘磬唐逸史曰玄宗在東都晝寢夢一女子容豔異常梳交心髻大袖寬衣帝曰汝何人曰妾凌波池中龍女也衛宮護駕妾實有功今陛下洞曉鈞天之樂願賜一曲以光族類帝於夢中為鼓胡琴倚歌為凌波池之曲龍女拜謝而去及寤盡記之命禁樂自御琵琶習而翻之因宴於凌波宮臨池奏新聲忽池

波湧起有神女出於波心乃夢中之女也  
望拜御坐良久方沒因置祠池上每歲祀  
之會要曰開元元年內出祭龍池樂章十  
六年築壇於興慶宮以仲春月祭之

第一章

姚崇

恭聞帝里生靈沼應報明君鼎業新既協翠泉光寶命  
還符白水出真人此時舜海潛龍躍此地堯河帶馬巡  
獨有前池一小雁叨承舊惠入天津



第二章

蔡孚

帝宅王家大道邊，神馬龍龜涌聖泉。  
昔日昔時經此地，  
看來看去漸成川。  
歌臺舞榭宜正月，  
柳岸梅洲勝往年。  
莫言波上春雲少，  
祇為從龍直上天。

第三章

沈佺期

龍池躍龍龍已飛，龍德先天天不違。  
池開天漢分皇一作  
黃道，龍向天門入紫微。  
邸第樓臺多氣色，  
君王鳧雁有光輝。  
為報寰中百川水，  
來朝上地莫東歸。

第四章

盧懷慎

代邸東南龍躍泉清漪碧浪遠浮天樓臺影就波中出  
日月光疑鏡裏懸雁沼回流成舜海龜書薦祉應堯年  
大川既濟慙為楫報德空思奉細涓

第五章

姜皎

龍池初出此龍山常經此地謁龍顏日日芙蓉生夏水  
年年楊柳變春灣堯壇寶匣餘煙霧舜海漁舟尚往還  
願以一作似飄颻五雲影從來從去九天間

第六章

崔日用

龍興白水漢興符聖主時乘運斗樞岸上葦葦五花樹  
波中的皦千金珠操環昔聞迎夏啟發匣先來瑞有虞  
風色雲光隨隱見赤雲神化象江湖

第七章

蘇頲

西京鳳邸躍龍泉佳氣休光鎮在天軒后霧圖今已得  
秦王水劍昔常傳恩魚不似昆明釣瑞鶴長如太液仙  
願侍巡遊同舊里更聞簫鼓濟樓船

第八卷

李义

星分邑里四人居水浮源流萬頃餘魏國君王稱象處  
晉家藩邸化龍初青蒲暫似遊梁馬綠藻還疑宴鎬魚  
自有神靈滋液地年年雲物史官書

第九章

姜晞

靈沼縈迴邸第前浴日涵天寫曙天始見龍臺昇鳳闕  
應如霄漢起神泉石匱渚傍還啓聖桃李初生更有仙  
欲化帝圖從此受正同河變一千年

第十章

裴 瓘

乾坤啟聖吐龍泉  
泉水年年勝一年  
始看魚躍方成海  
即覩龍飛利在天  
洲渚遙將銀漢接  
樓臺直與紫微連  
休氣榮光常不散  
懸知此地是神仙

梁郊祀樂章

五代會要曰梁開平二年正月太常奏定  
郊廟樂曲南郊降神奏慶和之樂舞崇德  
之舞皇帝行奏慶順奠玉幣登歌奏慶平

迎俎奏慶肅酌獻奏慶熙飲福酒奏慶隆  
送文舞迎武舞奏慶融亞獻終獻奏慶休  
送神奏慶和

慶和樂

趙光逢

就陽位昇圜丘佩雙玉御大裘膺天命擁神休萬靈感  
百祿道

秉黃鉞建朱旗震八表清二儀帝業顯王道夷受景命  
啓皇基

開九門懷百神通  
盱鑿接氤氳明  
粲薦廣樂陳奠  
嘉璧燎芳薪

膺寶圖執左契  
德應天聖饗帝  
薦表衷荷靈惠  
壽萬年祚百世

惟德動天有感  
必通秉茲一德  
禋於六宗欽寅  
寶命恭肅禮容  
來顧來饗永穆  
皇風

天惟佑德辟乃  
奉天交感斯在  
昭事罔愆歲功  
已就王道無偏  
於焉報本是用  
告虔

慶順

聖皇戾止天步舒遲乾乾睿相穆穆皇儀進退必肅陟  
降是祇六變克協萬靈協隨

慶平

天命降鑒帝德惟馨享祀不忒禮容孔明奠璧布幣薦  
純獻精神祐以荅敷錫永寧

慶肅

張袞

遵豆簋簋黍稷非馨懿茲彝器厥德惟明金石匏革以



和以平由此無體期乎永寧

慶熙

指后躬享旨酒斯陳王恭無數嚴祀惟寅皇祖以配大  
孝以振宜錫景福永休下民

慶隆

恭祀上帝于國之陽爵醴是荷鴻基永昌

慶融

導和氣分襲氤氲宣皇規兮彰聖神服遐裔兮敷質文

格苗扈兮息烟塵

慶休

大業來四夷仁風和萬國  
白日體無私皇天輔有德  
七旬罪已服六月師方克  
偉哉帝道隆終始常作則

慶和

烟燎昇禮容徹誠感達人神  
悅靈貺彰聖情結玉座寂  
金鑪歇

周郊祀樂章

五代史樂志曰太祖廣順元年邊蔚議改  
漢十二成為十二順之樂祭天神奏昭順  
之樂祭地祇奏寧順之樂祭宗廟奏肅順  
之樂登歌奠玉帛奏感順之樂皇帝行及  
臨軒奏治順之樂王公出入送文舞迎武  
舞奏忠順之樂皇帝食舉奏康順之樂皇  
帝受朝皇后入宮奏雍順之樂皇太子軒  
懸出入奏溫順之樂正至皇帝禮會登歌

奏禮順之樂郊廟俎入奏禮順之樂酌獻  
飲福奏福順之樂祭孔宣父齊太公降神  
同用禮順之樂三公升降及行同用忠順  
之樂享籍田同用寧順之樂

昭順樂

五兵勿用萬國咸安告功園蓋受命雲壇樂鳴鳳律禮  
備雞竿神光欲降衆目遐觀

治順樂

羽衛離丹闕金軒赴泰壇珠旗明月色玉佩曉霜寒黼  
黻龍衣備琮璜寶器完百神將受職宗社保長安

感順樂

明君陳大禮展幣祀園丘雅樂聲齊發祥雲色正浮

禋順樂

黃彝將獻特牲預迎既脩昭事潛達明誠

福順樂

相承五運取法三才大禮爰展率土咸來卿雲祕室甘

泉寶臺象樽初酌受福不回

福順樂

昊天成命邦國盛儀多士齊列六龍載馳壇升泰一樂  
奏咸池高明祚德永致昌期

福順樂

上天垂景貺哲后舉鸞觴明德今方祚邦家萬世昌

忠順樂

木鐸敷一作揚音文德昌朱干成列武功彰雷鼗鷺羽今

休用玉戚相叅正發揚

武舞樂

圭瓚方陳禮干旄乃象功成文非羽籥猛勢若罷熊

昭順樂

雲門孤竹蒼璧黃琮既祀天地克配祖宗虔脩盛禮仰  
荅玄功神歸碧落福降無窮

樂府詩集卷七



欽定四庫全書薈要卷一萬九千七百二十一

集部

樂府詩集卷八

宋 郭茂倩 編

郊廟歌辭

漢安世房中歌

通典曰周有房中之樂歌后妃之德秦始  
皇二十六年改曰壽人漢書禮樂志曰漢  
房中祠樂高祖唐山夫人所作凡樂樂其

所生禮不忘其本高祖樂楚聲故房中樂楚聲也孝惠二年使樂府令夏侯寬備其簫管更名安世樂宋書樂志曰魏文帝黃初二年議者以房中歌后妃之德所以風天下正夫婦乃改為正始之樂明帝太和初繆襲奏魏國初建王業所作登歌安世詩專以思詠神靈及說神靈墜享之意後省讀漢安世詩無有二南風化天下之言又改曰享神歌

大孝備矣休德昭清高張四縣樂充宮廷芬樹羽林雲  
景杳冥金支秀華庶旌翠旌七始華始肅倡和聲神來  
宴娛庶幾是聽

粥粥音送細齊人情忽乘青玄熙事備成清思眇眇經  
緯冥冥

我定歷數人告其心救身齊戒施教申申乃立祖廟敬  
明尊親大矣孝熙四極爰轉

王侯秉德其鄰翼翼顯明昭式清明宅矣皇帝孝德竟

全大功撫安四極

海內有姦紛亂東北詔撫成師武臣承德行樂交逆蕭  
勺羣慝肅為濟哉蓋定燕國

大海蕩蕩水所歸高賢愉愉民所懷大山崔百卉殖民  
何貴貴有德

安其所樂終產樂終產世繼緒飛龍秋游上天高賢愉  
樂民人

豐草萋女蘿施善何如誰能回大莫大成教德長莫長

被無極

雷震震電耀耀明德鄉治本約治本約澤弘大加被寵  
咸相保施德大世曼壽

都荔遂芳窅窅桂華孝奏天儀若日月光乘玄四龍回  
馳北行羽旄殷盛芬哉芒芒孝道隨世我署文章

桂華馮馮翼翼承天之則吾易久遠燭明四極

慈惠所愛美若休德杳杳冥冥克綽永福美芳磴磴即  
即師象山則

嗚呼孝哉策撫我國蠻夷竭歡象來致福兼臨是愛終  
無兵革

嘉薦芳矣告靈饗矣告靈既饗德音孔臧惟德之臧建  
侯之常承保天休令問不忘

皇皇鴻明蕩侯休一作嘉德嘉承天和伊樂厥福在樂不

荒惟民之則浚則師德下民咸殖令問在舊孔容翼翼

孔容之常承帝之明下民之樂子孫保光承順溫良一作

則受帝之光嘉薦令芳壽考不忘

承帝明德師象山則雲施稱民永受厥福承容之常承  
帝之明下民安樂受福無疆

晉宗廟歌

傅 玄

南齊書樂志曰晉泰始中傅玄造祠廟夕  
牲昭夏歌一篇迎送神肆夏歌一篇登歌  
七廟七篇饗神歌二篇玄云登歌歌盛德  
之功烈故廟異其文饗神猶周頌之有瞽  
及雍但說祭饗神明禮樂之盛七廟饗神

皆用之

夕牲歌

我夕我牲猗歟敬止嘉爰孔時供茲享祀神鑒厥誠博  
碩斯歆祖考降饗以虞孝孫之心

迎送神歌

嗚呼悠哉日鑒在茲以時享祀神明降之神明斯降既  
祐饗之祚我無疆受天之祐赫赫太上巍巍聖祖明明  
烈考丕承繼序



征西將軍登歌

經始宗廟神明戾止申錫無疆祇承享祀假哉皇祖綏  
予孫子燕及後昆錫茲繁祉

豫章府君登歌

嘉樂在庭薦祀在堂皇皇宗廟乃祖先皇濟濟辟公相  
予烝嘗享祀不忒降福穰穰

潁川府君登歌

於邈先后實司于天顯矣皇祖帝祉肇臻本支克昌資

始開元惠我無疆享祀永年

京兆府君登歌

於惟曾皇顯顯令德高明清亮匪競柔克保乂命祐基  
命惟則篤生聖祖光濟四國

宣皇帝登歌

於鑠皇祖聖德欽明勤施四方夙夜敬止載敷文教載  
揚武烈匡定社稷龔行天罰經始大業造創帝基畏天  
之命于時保之

景皇帝登歌

執競景皇克明克哲旁作穆穆惟祗惟畏纂宣之緒者  
定厥功登此雋乂糾彼羣凶業業在位帝既勤止維天  
之命於穆不已

文皇帝登歌

於皇時晉允文文皇聰明睿聖敬神武萬幾莫綜皇  
斯清之虎兕放命皇斯平之柔遠能邇簡授英賢創業  
垂統勲格皇天

饗神歌

曰晉是常享祀時序宗廟致敬禮樂具舉惟其來祭普  
天率土犧樽既奠清醑既載亦有和羹薦羞斯備烝烝  
永慕感時興思登歌奏舞神樂其和祖考來格祐我邦  
家敷天之下罔不休嘉

肅肅在位濟濟臣工四海來格禮儀有容鐘鼓振管絃  
理舞開元歌永始神胥樂兮肅肅在位臣工濟濟小大  
咸敬上下有禮理管絃振鼓鐘舞象德歌詠功神胥樂

兮肅肅在位有來雍雍穆穆天子相維辟公禮有儀樂  
有則舞象功歌詠德神胥樂兮

晉江左宗廟歌

歌高祖宣皇帝

曹毗

於赫高祖德協靈符應運撥亂釐整天衢勲格宇宙化  
動八區肅以典刑陶以玄珠神石吐瑞靈芝自敷肇基  
天命道均唐虞

歌世宗景皇帝

景皇承運纂隆洪緒皇維重抗天暉再舉蠢矣二寇擾  
我揚楚乃整元戎以膏齊斧疊疊神算赫赫王旅鯨鯢  
既平功冠帝宇

歌太祖文皇帝

太祖齊聖王猷誕融仁教四塞天基累崇皇室多難嚴  
清紫宮威厲秋霜惠過春風平蜀夷楚以文以戎奄有  
參墟聲流無窮

歌世祖武皇帝

於穆武皇允龔欽明應期登禪龍飛紫庭百揆時序聽  
斷以情殊域既賓偽吳亦平晨流甘露宵暎朗星野有  
擊壤路垂頌聲

歌中宗元皇帝

運屯百六天羅解貫元皇勃興網籠江漢仰齊七政俯  
平禍亂化若風行澤猶雨散淪光更耀金輝復煥德冠  
千載蔚有餘粲

歌肅宗明皇帝

明明肅祖闡弘帝祚英風夙發清暉載路姦逆縱忒罔  
式皇度躬振朱旗遂豁天步宏猷允塞高羅雲布品物  
咸寧洪基永固

歌顯宗成皇帝

於休顯宗道澤玄播式宣德音暢物以和邁德蹈仁匪  
禮弗過敷以純風濯以清波連理暎阜鳴鳳棲柯同規  
放勛義蓋山河

歌康皇帝



康皇穆穆仰嗣洪德為而不宰雅音四塞閉邪以誠鎮  
物以默威靜區宇道宣邦國

歌孝宗穆皇帝

孝宗夙哲休音允臧如彼晨離曜景扶桑垂訓華幄流  
潤八荒幽讚玄妙爰該典章西平僭蜀北靜舊疆高猷  
遠暢朝有遺芳

歌哀皇帝

於穆哀皇聖心虛遠雅好玄古大庭是踐道尚無為治

存易簡化若風行民猶草偃雖曰登遐徽音彌闡悃悃  
雲韶盡美盡善

歌太宗簡文皇帝

王 珣

皇矣簡文於昭于天靈明若神周淡如淵冲應其來實  
與其遷壘壘心化日用不言易而有親簡而可傳觀流  
彌遠求本逾玄

歌烈宗孝武皇帝

天鑒有晉欽哉烈宗同規文考玄默允龔威而不猛約

而能通神鉦一震九域來同道積淮海雅頌自東氣陶  
淳露化協時雍

四時祠祀歌

曹毗

肅肅清廟巍巍聖功萬國來賓禮儀有容鐘鼓振金石  
熙宣兆祚武開基神斯樂兮理管絃有來斯和一作  
雍說  
功德吐清歌神斯樂兮洋洋玄化潤被九壤民無不悅  
道無不往禮有儀樂一本無  
樂字有式詠九功永無極神斯

樂兮

宋宗廟登歌

王韶之

宋書樂志曰武帝永初中詔廟樂用王韶之所造七廟登歌七首又有七廟享神登歌一首并以歌章太后其辭亦韶之造

北平府君歌

綿綿遐緒明昭載融漢德未遠堯有遺風於穆皇祖永世克隆本枝惟慶貽厥靡窮

相國掾府君歌

乃立清廟清廟肅肅乃備禮容禮容穆穆顯允皇祖昭  
是嗣服錫茲繁祉聿懷多福

開封府君歌

四縣既序簫管既舉堂獻六瑚庭萬八羽先王有典克  
禋皇祖不顯洪烈永介休祐

武原府君歌

鐘鼓喤喤威儀將將溫恭禮樂致享曾皇邁德垂仁係  
軌重光天命純嘏惠我無疆

東安府君歌

鑠矣皇祖帝度其心永言配命播茲徽音思我茂猷如玉如金駿奔在陛是鑿是歌

孝皇帝歌

烝哉孝皇齊聖廣淵發祥誕慶景祚自天德敷金石道被管絃有命既集徽風永宣

高祖武皇帝歌

惟天有命眷求上哲赫矣聖武撫運桓撥功並敷土道

均汝墳止戈曰武經緯稱文烏龍失紀雲火代名受終  
改物作我宋京至道惟王大業有劬降德兆民升歌清  
廟

七廟享神歌

奕奕寢廟奉璋在庭笙簧既列犧象既盈黍稷匪芳明  
祀惟馨樂具禮充潔羞虜誠神之格思介以休禎濟濟  
羣辟永觀厥成

宋世祖廟歌

謝莊

孝武皇帝歌

帝錫二祖長世多祐於穆睿考龔聖承矩立極弛馭乾  
紐墜緒闡我皇維締我宋宇刷定四海肇構神京復禮  
輯樂散馬墮城澤牡九有化浮八瀛慶雲承掖甘露飛  
靈肅肅清廟徽徽闕宮舞蹈象德笙磬陳風黍稷非盛  
明德惟崇神其歆止降福無窮

宣太后歌

稟祥月輝毓德軒光嗣徽媯汭思媚周姜母臨萬寓訓



藹紫房朱玄玉篇式載瓊芳

宋章廟樂舞歌

宋書樂志曰章廟樂舞雜歌悉同用太廟  
辭惟三后別撰夕牲賓出入奏肅咸樂牲  
出入奏引牲樂薦豆呈毛血奏嘉薦樂迎  
神奏昭夏樂皇帝入廟北門奏永至樂太  
祝裸地奏登歌章太后室奏章德凱容之  
樂昭太后室奏昭德凱容之樂宣太后室

奏宣德凱容之樂皇帝還東壁受福酒奏  
嘉祚之樂送神奏昭夏之樂皇帝詣便殿  
奏休成之樂

肅咸樂

殷淡

彝承孝典恭事嚴聖浹天奉賚罄壤齊慶司儀具序羽  
容夙彰芬枝颺烈黼構周張助寶奠軒酌珍充庭璆縣  
凝會瑁朱竚聲先期選禮一作會肅若有承祇對靈祉皇

慶昭膺

尊事威儀輝容昭叙迅恭神明察盛牲俎肅肅嚴宮藹  
藹崇基皇靈降祉百祇具司戒誠望夜端列承朝依微  
昭旦物色輕宵一作宵鴻慶遐邇嘉慶令芳翊帝明德永  
祚流光

引牲樂

維誠絜饗維孝奠靈敬芬黍稷敬滌犧牲騂鹵在恭載  
溢載豐以承宗祀以肅皇衷蕭芳四舉華火周傳神監  
孔昭嘉是柔牲

嘉慶樂

肇禋戒祀禮容咸舉六典飭文九司昭序牲柔既昭犧  
剛既陳恭滌惟清敬事惟神加邊再御兼俎重慶節動  
軒越聲流金縣奕奕闕幄疊疊嚴闈潔誠夕鑒端服晨  
暉聖靈戾止翊我皇則上綏四寓下洋萬國永言孝饗  
孝饗有容儉儉贊列肅肅雍雍

昭夏樂

闕宮黜黜複殿微微璇除肅炤釭壁彤輝黼帝神凝玉

堂嚴馨園火夕耀方水朝清金枝委樹翠鐙竚縣溇波  
澄宿華漢浮天恭事既夙虔心有慕仰降皇靈俯寧休  
祚

永至樂

漢書禮樂志曰皇帝入廟門奏永至以為  
行步之節猶古采齊一作  
菴肆夏也

皇朝鬯矣孝容以昭鑿華羽迺拂漢涵濟申申嘉夜翊  
翊休朝行金景送步玉風韶師承祀則肅對裡桃

登歌

帝容承祀練時涓日九重徹闕四靈賓室肅唱函音庶  
旄委佾休靈告饗嘉慶尚芬玉瑚飾列桂簋昭陳具司  
選禮翼翼振振

裸崇祀典耐恭孝時禮無爽物信靡媿辭精華孚鬯誠  
監昭通升歌翊節下管調風皇心履變敬明尊親大哉  
孝德至矣交神

章德凱容樂

幽瑞浚靈表彰嬪聖翊載徽文敷光崇慶上緯纏祥中  
維飾詠永屬輝猷聯昌景命

昭德凱容樂

明帝

表靈躔象縉儀緯風膺華丹耀登瑞紫穹訓彤霄宇武  
彰宸宮騰芬金石寫德聲容

宣德凱容樂

天樞凝耀地紐儷輝聯光騰世炳慶翔機薰藹中寓景  
躔上微玉頌鏤德金籥傳徽

嘉祚樂

殷淡

禮慶洽福時昌皇聖膺嘉祐帝業凝休祥居極乘景運  
宅德瑞中王澄明臨四表精華延八鄉洞海周聲惠徹  
寓麗乾光靈慶纏世祉鴻烈永無疆

昭夏樂

大孝備威禮豐神安留嘉樂充旋駕聳汎青宮延八虛  
闢四空藹流景肅行風

昭融教緝風度戀皇靈結深慕解羽縣輟華樹偕琬除



端玉輅流汪濊慶國步

休成樂


漢書禮樂志登歌再終下奏休成之樂美  
神明既饗也

醜醴具登嘉俎咸虔饗洽誠陳禮周樂徧祝辭罷裸序  
容輟縣蹕動端庭鑿回嚴殿神儀駐景華漢亭虛八靈  
案衛三祗解途翠盖耀澄畢奕凝宸玉鑣息節金輅懷  
音式誠遠孝底心肅感追憑皇鑒思承淵範神錫懋祉

四緯昭明仰福帝  
徽俯齊庶生



樂府詩集卷八



總校官進士 臣胡榮

校對官庶吉士 臣翟槐

謄錄監生 臣馬植基

欽定四庫全書薈要

集部

樂府詩集卷九

十

詳校官候選知縣臣吳甸華



欽定四庫全書薈要卷一萬九千七百二十二

集部

樂府詩集卷九

宋 郭茂倩 編

郊廟歌辭

齊太廟樂歌

南齊書樂志曰宋昇明中太祖為齊王令司馬褚淵造太廟登歌二章建元初詔謝超宗造廟樂歌詩十六章永明二年又詔王儉造

太廟二室歌辭其久牲羣臣出入奏肅成樂

牲出入奏引牲樂薦豆呈毛血奏嘉薦樂迎

神奏昭夏樂皇帝入廟北門奏永至樂太祝

裸地奏登歌皇祖廟陵丞太中大夫淮陰令

皇曾祖即丘令皇祖太常卿五室並奏凱容

樂皇考宣皇帝室奏宣德凱容樂昭皇后室

奏凱容樂皇帝還東壁上福酒奏永祚樂送

神奏肆夏樂皇帝詣便殿奏休成樂太祖高

皇帝室奏高德宣烈樂穆皇后室奏穆德凱  
容樂高宗明皇帝室奏明德凱容樂古今樂  
錄曰梁何佟之周捨等議以為周禮牲出入  
奏昭夏而齊氏仍宋儀注迎神奏昭夏牲出  
入更奏引牲樂乃以牲牢之樂用接祖宗之  
靈宋季之失禮也

肅咸樂

謝超宗

絜誠底孝孝感烟霜寅儀式序肅禮綿張金華樹藻肅

哲騰光殷殷升奏嚴嚴階庠匪椒匪玉是降是將懋分  
神衷翊祐傳昌

引牲樂

肇祀嚴靈恭禮尊國達敬傳典結孝陳則芬滌既肅犧  
牲既整聳誠流思端儀選景肆禮佇夜綿樂望晨崇席  
皇鑒用饗明神

嘉薦樂

清思眴眴闕寢微微恭言載感肅若有希芬俎具陳嘉



薦兼列凝馨烟颺分焰星暫睿靈式降協我帝道上澄  
五緯下陶八表

昭夏樂

涓辰選氣展禮恭祇重闈月洞層牖烟施載虛玉鬯載  
受金枝天歌折饗雲舞罄儀神惟降止泛景凝羲帝華  
永藹泯藻方摛

永至樂

戲絲惟則姬經式序九司聯事八方承宇鑿迥靜陳縵

樂具舉凝旒若慕傾璜載竚振振璇衛穆穆禮容載藹  
皇步式敷帝蹤

登歌

清明一作容既鬯大孝乃熙天儀晬愴皇心儼思既芬房

豆載絜牲牲鬱裸升禮銅玉登聲茂對幽巖式奉徽靈  
以享以祀惟感惟誠

凱容樂

國昭惟茂帝穆惟崇登祥緯遠締世景融紛綸睿緒菴

蔚王風明進厥始濬哲文終

凱容樂

璇條黃蔚瓊源浚照懋矣皇烈載挺明劬永言敬思式  
恭惟教休途良乂榮光有耀

凱容樂

嚴宗正典崇饗肇裡九章既飾三清既陳昭恭皇祖承  
假徽神貞祐伊協卿藹是鄰

凱容樂

肅惟敬祀絜事參薌環袿像綴緬密絲簧明明烈祖尚  
錫龍光粵雅于姬伊頌在商

凱容樂

神宮懋鄴明寢昌基德凝羽綴道邕容辭假我帝緒懿  
我皇維昭大之載國齊之祺

宣德凱容樂

道闕期運義開藏用皇矣睿祖至哉攸縱循規烈炤襲  
矩重芬德溢軒義道懋炎雲

凱容樂

月靈誕慶雲瑞開祥道茂淵柔德表徽章粹訓宸中儀  
形宙外容蹈凝華金羽傳藹

永祚樂

構宸抗宇合軫齊文萬靈載溢百禮以殷朱絃繞風翠  
羽停雲桂樽既滌瑤俎既薰升薦惟誠昭禮惟芬降祉  
遙裔集慶氤氳

肆夏樂

禮既升樂以愉昭序溢幽饗餘人祇鬯敬敷神光動  
靈駕翔芬九垓鏡八鄉福無屆祚無疆

休成樂

睿孝式鬯饗敬爰偏諦容輟序佾文靜縣辰儀聳蹕霄  
衛浮鑿旒帝雲舒翠華景搏恭惟尚烈休明再纏國猷  
遠藹昌圖聿宣

太廟登歌

褚淵

惟王建國設廟凝靈月薦流典時祀暉經瞻宸優思雨

露追情簡日  
莖晷閱奠升  
文金壘淳桂  
沖幄舒薰備  
僚肅列駐景  
開雲

至饗攸極睿  
孝悫禮具物  
咸絜馨香

一作馨聲

合體氣昭扶

幽眇慕纏遠  
迎絲驚促送  
佾留晚聖衷  
踐候節改增  
愴妙感崇深  
英徽彌亮

高德宣烈樂

王儉

悠悠草昧穆  
穆經綸乃文  
乃武乃聖乃  
神動龕危亂  
靜比斯民誕  
膺休命奄有  
八寅握機肇  
運光啟禹服  
義滿

天淵禮昭地軸澤靡不懷威無不肅戎夷竭歡象來致  
福偃風裁化暄日敷祥信星含曜秬草流芳七廟觀德  
六樂宣章惟先惟敬是饗是將

穆德凱容樂

太姒嬪周塗山儷禹我后嗣徽重規疊矩肅肅闕宮翔  
翔雲舞有饗德馨無絕終古

明德凱容樂

多難固業殷憂啟聖帝宗績武維時執競起柳獻祥百



堵興詠義雖祀夏功符受命遠無不懷邇無不肅其儀  
濟濟其容穆穆赫矣君臨昭哉嗣服允王惟后膺此多  
福禮以昭事樂以感靈八簋陳室六舞充庭觀德在廟  
象德在形四海來祭萬國咸寧

梁宗廟登歌七首

沈約

功高禮洽道尊樂備三獻具舉百司在位誠敬罔訾幽  
明同致茫茫億兆無思不遂蓋之如天容之如地

殷兆玉筐周始邠王於赫文祖基我大梁肇土七十奄

有四方帝軒百祀人思未忘永言聖烈祚我無疆

有夏多罪殷人塗炭四海倒懸十室思亂自天命我殲  
凶殄難既躍乃飛言登天漢爰饗爰祀福祿攸贊

犧象既飾壘俎斯具我鬱載馨黃流乃注我我卿士駿  
奔是務佩上鳴堦纓還拂樹悠悠億兆天臨日煦

猗歟至德光被黔首鑄鎔蒼昊甄陶區有肅恭三獻對  
揚萬壽比屋可封含生無咎匪徒七百天長地久

有命自天於皇后帝悠悠四海莫不來祭繁祉具膺八

神聳衛福至有兆慶來無際播此餘休于彼荒裔  
祀典昭絜我禮莫違八簋充室六龍解駢神宮肅肅靈  
寢微微嘉薦既饗景福攸歸至德光被洪祚載輝

梁小廟樂歌

隋書禮儀志梁又有小廟太祖太夫人廟  
也非嫡故別立廟皇帝每祭太廟訖詣小  
廟亦以一太牢如太廟禮

舞歌

闕宮肅肅清廟濟濟於穆夫人固天攸啓祚我梁德膺  
斯盛禮文棐達嚮重檐丹陛飾我俎彝絜我粢盛躬事  
奠饗推尊盡敬悠悠萬國具承茲慶大孝追遠兆庶攸  
詠

登歌

光流者遠禮貴彌申嘉饗云備盛典必陳追養自本立  
愛惟親皇情乃慕帝服來尊駕齊六轡旂耀三辰感茲  
霜露事彼冬春以斯孝德永被烝民

陳太廟舞辭

隋書樂志曰陳初並用梁樂唯改七室舞  
辭皇祖步兵府君正員府君懷安府君皇  
高祖安成府君皇曾祖太常府君五室並  
奏凱容舞皇祖景皇帝室奏景德凱容舞  
皇考高祖武皇帝室奏武德舞

凱容舞

於赫皇祖宮墻高窳邁彼厥初成茲峻極縵樂簡簡閔

寢翼翼裸饗若存惟靈靡測

凱容舞

昭哉上德浚彼洪源道光前訓慶流後昆神猷緬一作邈清廟斯存以享以祀惟祖惟尊

凱容舞

選辰崇饗飾禮嚴敬靡愛牲牢兼馨粢盛明明烈祖龍光遠暎肇我王風形斯舞詠

凱容舞

道遙積慶德遠昌基永言祖武致享從思九章停列八  
舞迴墀靈其降止百福來綏

凱容舞

肇迹締基義標鴻篆恭惟載德瓊源方闡享薦三清筵  
陳四璉增我堂構式敷帝典

景德凱容舞

皇祖執德長發其祥顯仁藏用懷道韜光寧斯閔寢合  
此蕭薌永昭貽厥還符翦商

武德舞

烝哉聖祖撫運升離道周經緯功格玄祇方軒邁扈比  
舜陵媯緝熙是詠欽明在斯雲雷邁屯圖南共舉大定  
揚越震威衡楚四奧宅心九疇還叙景星出翼非雲入  
呂德暢容辭慶昭羽綴於穆清廟載揚徽烈嘉玉既陳  
豐盛斯絜是將是享鴻猷無絕

北齊享廟樂辭

隋書樂志曰齊享廟樂先祀一日夕牲羣



臣入奏肆夏迎神奏高明登歌樂牲出入  
薦毛血並奏昭夏樂三公出進熟羣臣入  
並奏肆夏辭同皇帝入北門奏皇夏樂太  
祝裸地奏登歌樂皇帝詣東陛及升殿並  
奏皇夏辭同皇帝既升殿殿上作登歌樂  
皇帝初獻六世祖司空公五世祖吏部尚  
書高祖秦州刺史曾祖太尉武貞公祖文  
穆皇帝五室並奏始基樂恢祚舞獻高祖

神武皇帝室奏武德樂昭烈舞獻文襄皇  
帝室奏文德樂宣政舞獻顯祖文宣皇帝  
室奏文正樂光大舞皇帝還東壁飲福酒  
奏皇夏樂送神奏高明樂皇帝詣便殿奏  
皇夏樂羣臣出奏肆夏辭同

肆夏樂

霜淒雨暢烝哉帝心有敬其祀肅事惟敬昭昭車服濟  
濟衣簪鞠躬貢酎磬折奉琛差以五列和以八音式祇

王度如玉如金

高明登歌樂

日卜惟吉辰擇其良奕奕清廟黼黻周張大呂為角應  
鍾為羽路鼗陰竹德歌昭舞祀事孔明百神允穆神心  
乃顧保茲介福

昭夏樂

大祀云事獻奠有儀既歌既展贊顧迎犧執從伊竦芻  
飾惟慄俟用於庭將升於室且握且駢以致其誠惠我

貽頌降祉千齡

昭夏樂

緬彼遐慨悠然永思留連七享纏綿四時神升魄沉靡  
聞靡見陰陽載俟臭聲兼薦祖考其鑒言萃王休降神  
敷錫百福是由

皇夏樂

齊居嚴殿夙駕層闈車輅垂彩旒袞騰輝聳誠載仰翹  
心有慕洞洞自形斤斤表步閔宮有邃神道依侑孝心

緬邈爰屬爰依

登歌樂

太室窅窅神居宿設鬱鬯惟芬珪璋惟絜粢粢應時龍  
蒲代用藉茅無咎福祿攸降端感會事儼思脩禮齊齊  
勿勿俄俄濟濟

登歌樂

我祠我祖永惟厥先炎農肇聖靈祉蟬聯霸圖中造帝  
業方宣道昌基構撫運承天奄家六合爰光八埏尊神

致禮孝思惟纏寒來暑反惕薦在年匪敬伊慕備物不  
愆設虞設業鞞鼓填填辟公在位有容伊虔登歌啓佾  
下管應懸厥容無爽幽明肅然誠而厚地和達穹玄既  
調風雨載協山川周庭有列湯孫永延教聲惟被邁後  
光前

始基樂恢祚舞

克明克俊祖武惟昌業弘營土聲被海方有流厥德終  
耀其光明神幽贊景祚攸長

始基樂祚舞

顯允盛德隆我前構瑤源彌瀉瓊根愈秀誕惟有族丕  
緒克茂大業崇新洪基增舊

始基樂祚舞

祖德丕顯明詰知機豹變東國鵠起西歸禮申官次命  
改朝衣敬思孝享多福無違

始基樂祚舞

兆靈有業潛德無聲韜光戢耀貫幽洞冥道弘舒卷施

博藏行緬追歲事夜遽不寧

始基樂恢祚舞

皇皇祖德穆穆其風語嘿自己明  
敷在躬荷天之錫聖表克隆高山  
作矣寶祚其崇離光旦旦載煥載  
融感薦惟永神保無窮

武德樂昭烈舞

天造草昧時難糾紛孰拯斯溺靡  
救其焚大人利見緯武經文顧指  
維極吐吸風雲開天闢地峻岳夷  
海冥工



掩迹上德不宰神心有應龍化無待義征九服仁兵告  
凱上平下成靡或不寧匪王伊帝偶極崇靈享親則孝  
絜祀惟誠禮備樂序肅贊神明

文德樂宣政舞

聖武丕基獻文顯統眇哉神啓鬱矣天縱道則人弘德  
云邁種昭冥咸叙崇深畢綜自中祖外經朝庇野政反  
淪風威還缺雅旁作穆穆格於上下維享維宗來鑒來  
假

文正樂光大舞

玄厯已謝蒼靈告期圖璽有屬揖讓惟時龍升獸變弘  
我帝基對揚穹昊實啓雍熙欽若皇猷永懷王度欣賞  
斯穆威刑允措軌物俱宣憲章咸布俗無邪指下歸正  
路茫茫九域振以乾綱混通華裔配括天壤作禮視德  
列樂傳響薦祀惟虔衣冠載仰

皇夏樂

孝心翼翼率禮兢兢時洗時薦或降或升在堂在戶載

湛載凝多品斯奠備物攸膺蘭芬敬挹玉俎恭承受祭  
之祐如彼岡陵

高明樂

仰棖稱慕衣冠禮云罄祀將闌神之駕紛奕奕乘白雲  
無不適窮昭域極幽塗歸帝祉眷皇都

皇夏

禮行斯畢樂奏以終受嘏先退載暢其衷鑿軒循轍麾  
旌復路光景徘徊絃歌顧慕靈之相矣有錫無疆國圖

日鏡

一作鏡

家歷天長

周宗廟歌

庾信

隋書樂志曰周宗廟樂皇帝入廟門奏皇  
夏降神奏昭夏俎入皇帝升階獻皇高祖  
皇曾祖德皇帝皇祖太祖文皇帝文宣皇  
太后閔皇帝明皇帝高祖武皇帝七室皇  
帝還東壁飲福酒還便坐並奏皇夏

皇夏

肅肅清廟巖巖寢門歌器防滿金人戒言應棟懸鼓崇  
牙樹羽階變升歌庭紛象舞閑安象設緝熙清真春鮪  
初登新萍先薦儼然入室儼乎其位悽愴履之非寒之  
謂

昭夏

永維祖武潛慶靈長龍圖革命鳳厯歸昌功移上塲德  
耀中陽清廟肅肅猛虜煌煌曲高大夏聲和盛唐牲牷  
蕩滌蕭合馨香和鑾戾止振鷺來翔永敷萬國是則四

方

皇夏

年祥辨日上

一作土

協龜言奉酌承列來庭駿奔雕禾飾

竿翠羽承樽敬殫如此恭惟執燔

皇夏

慶緒千重秀鴻源萬里長無時猶戢翼有道故韜光盛  
德必有後仁義終克昌明星初兆慶大電久呈祥

皇夏

克昌光上烈基聖穆西藩崇仁高涉渭積德被居原帝  
圖張往迹王業茂前尊重芬德陽廟疊慶壽陵園百靈  
光祖武千年福孝孫

皇夏

雄圖屬天造宏略遇羣飛風雲猶聽命龍躍遂乘機百  
二當天險三分拒樂推函谷風塵散河陽氛霧晞濟弱  
淪風起扶危頽運歸地紐崩還正天樞落更追原祠乍  
超忽畢隴或綿微終封三尺劔長卷一戎衣

皇夏

月靈興慶沙祥發源功參禹迹德贊堯門言容典禮禴  
狄徽章儀形溫德令問昭陽日月不居歲時晚晚  
一作婉  
瑞雲纏心闕宮惟遠

皇夏

龍圖基代德天步屬艱難謳歌還受瑞揖讓乃登壇升  
輿芒刺重入位據闕寒卷舒雲汎濫游揚日浸微出鄭  
終無反居桐竟不歸祀夏今惟舊尊靈謚更追



皇夏

若水逢降君窮柔屬惟政丕哉馭帝錄鬱矣當天命方  
定五雲官先齊八風令文昌氣似珠太史河如鏡南宮  
學已開東觀書還聚文辭金石韻毫翰風飈豎清室桂  
馮馮齊房芝詡詡寧思玉管笛空見靈衣舞

皇夏

南河吐雲氣北斗降星辰百靈咸仰德千年一聖人書  
成紫微動律定鳳凰馴六軍命西土甲子陳東隣戎衣

此一定萬里更無塵烟雲同五色日月並重輪流沙既  
西靜蟠木又東臣凱樂聞朱雁鏡歌見白麟今為六代  
祀還得九疑賓

皇夏

禮殫裸獻樂極休成長離前揆宗祀文明縮酌浮蘭澄  
壘合鬯磬折禮容旋迴靈貺受釐徹俎飲福移樽惟光  
惟烈文子文孫

皇夏

庭闕四始筵終三薦顧步堦墀徘徊餘奠六龍矯首七  
萃警途鼓移行漏風轉相烏翼翼從事綿綿四時惟神  
降嘏永言保之

周大禘歌

庾信

周宗廟大禘樂降神奏昭夏奠玉帛奏登  
歌餘同宗廟時享

昭夏

律在夾鐘服居蒼袞杳杳清思綿綿長遠就祭於合班

神於本來庭有序助祭有章樂舞六代賓歌二王和鈴  
以節絳革斯鏘齊宮饌玉鬱竿浮金洞庭鐘鼓龍門瑟  
琴其樂已變惟神是臨

登歌

神惟顯思不言而令玉帛之禮敢陳莊敬奉如弗勝薦  
如受命交於神明愨於言行

樂府詩集卷九